

**პროექტი***(საჯარო განხილვისათვის)***გენეტიკურად მოდიფიცირებული სურსათისა და ცხოველის საკვების შესახებ****მუხლი 1.**

სურსათის/ცხოველის საკვების უვნებლობის, ვეტერინარიისა და მცენარეთა დაცვის კოდექსის 75-ე მუხლის მე-2 ნაწილის შესაბამისად, დამტკიცდეს თანდართული გენეტიკურად მოდიფიცირებული სურსათისა და ცხოველის საკვების შესახებ წესი.

**მუხლი 2.**

დადგენილება, გარდა ამ დადგენილებით დამტკიცებული გენეტიკურად მოდიფიცირებული სურსათისა და ცხოველის საკვების შესახებ წესის მე-7 მუხლის მე-2 და მე-3 პუნქტებით განსაზღვრული მოთხოვნებისა, ამოქმედდეს 2022 წლიდან.

**მუხლი 3.**

ამ წესის მე-7 მუხლის მე-2 და მე-3 პუნქტებით განსაზღვრული მოთხოვნები ამოქმედდეს 2023 წლის 1 იანვრიდან.

**პრემიერ - მინისტრი****გიორგი კვირიკაშვილი**

## გენეტიკურად მოდიფიცირებული სურსათისა და ცხოველის საკვების შესახებ წესი

### მუხლი 1. ზოგადი დებულებები

გენეტიკურად მოდიფიცირებული სურსათისა და ცხოველის საკვების შესახებ წესი (შემდგომში - წესი) ადგენს მოთხოვნებს გენეტიკურად მოდიფიცირებული სურსათისა და ცხოველის საკვების მიმართ და აწესრიგებს ბიზნესოპერატორის მიერ მათი წარმოებისა და ბაზარზე განთავსების პირობებს.

### მუხლი 2. მიზანი და გამოყენების სფერო

1. ეს წესი მიზნად ისახავს გენმოდიფიცირებული სურსათისა და ცხოველის საკვების შიდა ბაზრის ეფექტიანი ფუნქციონირების უზრუნველყოფას, ადამიანის ჯანმრთელობისა და სიცოცხლის, ცხოველის ჯანმრთელობისა და კეთილდღეობის, მომხმარებელთა უფლებების და გარემოს დაცვას;

2. ეს წესი ადგენს გენმოდიფიცირებული სურსათისა და ცხოველის საკვების ავტორიზაციის და მათზე ზედამხედველობის პროცედურებს და მოთხოვნებს ეტიკეტირების მიმართ.

3. ამ წესით განსაზღვრული მოთხოვნები ვრცელდება:

- ა) სურსათად გამოსაყენებელ გენმოდიფიცირებულ ორგანიზმებზე;
- ბ) სურსათზე, რომელიც შეიცავს ან შედგება გენმოდიფიცირებული ორგანიზმებისაგან;
- გ) სურსათზე, რომელიც წარმოებულია გენმოდიფიცირებული ორგანიზმებისაგან ან შეიცავს გენმოდიფიცირებული ორგანიზმებისაგან წარმოებულ ინგრედიენტებს;
- დ) ცხოველის საკვებად გამოყენებულ გენმოდიფიცირებულ ორგანიზმებზე;
- ე) ცხოველის საკვებზე, რომელიც შეიცავს ან შედგება გენმოდიფიცირებული ორგანიზმებისაგან;
- ვ) ცხოველის საკვებზე, რომელიც წარმოებულია გენმოდიფიცირებული ორგანიზმებისგან.

4. გენეტიკურად მოდიფიცირებული სურსათი/ცხოველის საკვები უნდა აკმაყოფილებდეს საქართველოს კანონმდებლობით განსაზღვრულ მოთხოვნებს.

### **მუხლი 3. ტერმინთა განმარტებები**

1. ამ წესის მიზნებისათვის, სურსათის/ცხოველის საკვების უვნებლობის, ვეტერინარიისა და მცენარეთა დაცვის კოდექსით განსაზღვრულ ტერმინებთან ერთად, გამოიყენება ტერმინები, რომელთაც აქვთ შემდეგი მნიშვნელობა:

ა) **ორგანიზმი** - რეპლიკაციისა ან გენეტიკური ინფორმაციის გადაცემის უნარის მქონე ნებისმიერი ბიოლოგიური არსება;

ბ) **განზრახ გამოთავისუფლება** - გენმოდულირებული ორგანიზმ(ებ)ის ან მათი კომბინაცი(ებ)ის გარემოში ნებისმიერი წინასწარი განზრახვით გამოთავისუფლება, როდესაც მათი ადამიანებთან და გარემოსთან კონტაქტის შეზღუდვის და უსაფრთხოების მაღალ დონეზე უზრუნველყოფისათვის, არ ხდება არანაირი დაცვითი ზომების გამოყენება;

გ) **გარემოს მიმართ რისკის (ეკოლოგიური რისკის) შეფასება** - გენმოდულირებული ორგანიზმების გარემოში განზრახ გამოთავისუფლებით ან ბაზარზე განთავსების შედეგად ადამიანის ჯანმრთელობაზე და გარემოზე პირდაპირი ან არაპირდაპირი, მყისიერი ან კუმულაციური რისკების შეფასება;

დ) **გენეტიკურად მოდიფიცირებული ორგანიზმი** - (შემდგომში - გენმოდულირებული ორგანიზმი ან გმო), ნებისმიერი ორგანიზმი (ადამიანის გარდა), რომლის გენეტიკური მასალა შეცვლილია არაბუნებრივი (თანამედროვე ბიოტექნოლოგიური) მეთოდების გამოყენებით, რაც ნიშნავს ორგანიზმის გენეტიკური მასალის შეცვლას ხელოვნურ (in vitro) პირობებში ნუკლეინის მჟავების ორგანიზმის უჯრედებში ან ორგანელებში პირდაპირი ინექციის მეთოდის ან/და სხვადასხვა ტაქსონომიური სტატუსის მქონე ორგანიზმების უჯრედების შერწყმის მეთოდების გამოყენებით. ეს მეთოდები საშუალებას იძლევა, გადაიღახოს ბუნებრივი, ფიზიოლოგიური, რეპროდუქციული ან რეკომბინაციული ბარიერი. ამავე დროს ეს მეთოდები არ განეკუთვნება ტრადიციულ სელექციურ და ჯიშთა გამოყვანის მეთოდებს;

ე) **გენეტიკურად მოდიფიცირებული სურსათი** - სურსათი, რომელიც შეიცავს, შედგება ან წარმოებულია გმო-დან;

ვ) **გენეტიკურად მოდიფიცირებული ცხოველის საკვები** - ცხოველის საკვები, რომელიც შეიცავს, შედგება ან წარმოებულია გმო-დან;

ზ) **სურსათში გამოყენებისთვის განკუთვნილი გმო** - გმო, რომელიც შესაძლებელია უშუალოდ იქნას გამოყენებული სურსათად ან გამოყენებული იქნას სურსათის წარმოებისათვის საწყის ნედლეულად;

თ) **ცხოველის საკვებში გამოყენებისთვის განკუთვნილი გმო** - გმო, რომელიც შესაძლებელია უშუალოდ გამოყენებული იქნას ცხოველის საკვებად ან გამოყენებული იქნას ცხოველის საკვების წარმოებისათვის საწყის ნედლეულად;

ი) **გმო-დან წარმოებული** - გმო-დან სრულად ან ნაწილობრივ მიღებული პროდუქტი, რომელიც არ შეიცავს გმო-ს ან არ შედგება გმო-გან;

კ) **საკონტროლო ნიმუში** - გმო ან მისი გენეტიკური მასალა (დადებითი ნიმუში) და საწყისი (მშობლიური) ორგანიზმი ან მისი გენეტიკური მასალა, რომელიც გამოყენებული იქნა გენეტიკური მოდიფიკაციის მიზნით (უარყოფითი ნიმუში);

ლ) **ჩვეულებრივი (ტრადიციული) ანალოგი** - მსგავსი, ანალოგიური სურსათი ან ცხოველის საკვები, რომელიც არ არის წარმოებული გენეტიკური მოდიფიკაციის საშუალებით და რომელსაც აქვს უვნებელი გამოყენების კარგად დასაბუთებული ისტორია;

მ) **ინგრედიენტი** - ნებისმიერი ნივთიერება ან პროდუქტი, მათ შორის არომატიზატორი, საკვებდანამატი, საკვები ფერმენტი და ასევე შედგენილი ინგრედიენტის ნებისმიერი შემადგენელი ნაწილი, რომელიც გამოიყენება სურსათის წარმოებისა და დამზადებისას და მზა სურსათში არსებობს საწყისი ან/და შეცვლილი ფორმით. ნარჩენები არ მიეკუთვნება ინგრედიენტს;

ნ) **ბაზარზე განთავსება** - ბიზნესოპერატორის მიერ სურსათის/ცხოველის საკვების რეალიზაციის მიზნით განთავსება, მათ შორის, გაყიდვის ან სხვა ფორმით გადაცემის შეთავაზება, სასყიდლით ან უსასყიდლოდ მიწოდება, რეალიზაცია, დისტრიბუცია და სხვა ფორმით მიწოდება;

ო) **საზოგადოებრივი კვების ობიექტი** - ნებისმიერი დაწესებულება, სატრანსპორტო საშუალებების, სტაციონარული, მობილური ჯიხურის (ფარდული, სავაჭრო დახლი) ჩათვლით, (მაგალითად, რესტორანი, სასადილო, სკოლა, საავადმყოფო და სარესტორნო მომსახურება (სურსათის მომზადებისა და მიწოდების სერვისი), სადაც სავაჭრო - საწარმოო საქმიანობით ხდება საბოლოო მომხმარებლისათვის მზა სურსათის დამზადება;

პ) **დაფასოებული სურსათი** - საცალო ვაჭრობის პუნქტში განთავსებამდე წინასწარ ნაწილობრივ ან მთლიანად შეფუთული ერთეული, რომელიც მიეწოდება საბოლოო მომხმარებელს ან/და საზოგადოებრივი კვების ობიექტს, რომელიც შედგება სურსათისა და შესაფუთი მასალისაგან და რომლის შიგთავსის შეცვლა შეუძლებელია შეფუთვის გახსნის ან შეცვლის გარეშე. დაფასოებულ სურსათს არ განეკუთვნება სურსათი, რომლის შეფუთვა ხდება საცალო ვაჭრობის პუნქტში მომხმარებლის თხოვნით ან წინასწარ დაფასოებულია დაუყონებლივ (უშუალოდ) რეალიზაციის მიზნით;

ჟ) **გენეტიკურად მოდიფიცირებული სურსათისა და ცხოველის საკვების ავტორიზაცია** - პროცესი, რომელიც მოიცავს ევროკავშირის ან გენეტიკურად მოდიფიცირებული სურსათისა და ცხოველის საკვების მარეგულირებელი სხვა სახელმწიფო ორგანოს მიერ ბაზარზე დაშვებული გენეტიკურად მოდიფიცირებული

ავტორიზებული სურსათისა და ცხოველის საკვების სახელმწიფო რეესტრში შეტანას და საქართველოს ბაზარზე განთავსების დაშვებას.

**რ) ავტორიზაციის მაძიებელი** - გენეტიკურად მოდიფიცირებული სურსათისა და ცხოველის საკვების ავტორიზაციის შესახებ განაცხადის შემტანი ბიზნესოპერატორი;

**ს) უნიკალური იდენტიფიკატორი** - ციფრული ან ანბანურ-ციფრული მარტივი კოდი, რომლითაც შესაძლებელია გენმოდიფიცირებული ორგანიზმის და მისი მიღებისათვის გამოყენებული ტრანსფორმაციის ავტორიზებული მეთოდის იდენტიფიკაცია, რაც ამ გენმოდიფიცირებული ორგანიზმის შესახებ კონკრეტული ინფორმაციის მიღების საშუალებას იძლევა.

2. ამ წესის მიზნებისთვის, ასევე გამოიყენება საქართველოს კანონმდებლობით განსაზღვრული სხვა ტერმინები.

#### **მუხლი 4. ზოგადი მოთხოვნები**

1. ამ წესის მე-2 მუხლის მე-3 პუნქტით განსაზღვრული სურსათი /ცხოველის საკვები:

ა) არ უნდა ახდენდეს მავნე ზეგავლენას ადამიანის/ცხოველის ჯანმრთელობაზე და გარემოზე.

ბ) არ უნდა შეჰყავდეს შეცდომაში მომხმარებელი;

გ) არ უნდა განსხვავდებოდეს ჩვეულებრივი ტრადიციული ანალოგისაგან, ანუ იმ სურსათის/ცხოველის საკვებისგან, რომელთა ჩანაცვლებისთვისაც არის განკუთვნილი, ამასთან, კვებითი ღირებულების თვალსაზრისით, მისი ზომიერი, ჩვეულებრივი მოხმარება უსარგებლო არ უნდა იყოს ადამიანის ან/და ცხოველის კვებისათვის.

2. ამ წესის მე-2 მუხლის მე-3 პუნქტის „დ - ვ“ ქვეპუნქტებით განსაზღვრული ცხოველის საკვები ზიანს არ უნდა აყენებდეს ან შეცდომაში არ უნდა შეჰყავდეს მომხმარებელი, ცხოველური წარმოშობის პროდუქტებისთვის დამახასიათებელ თვისებებზე მავნე ზემოქმედებით.

3. სურსათში გამოსაყენებლად განკუთვნილი გმო ან ამ წესის მე-2 მუხლის მე-3 პუნქტის „ა-გ“ ქვეპუნქტებით განსაზღვრული სურსათი ბაზარზე განთავსებული უნდა იქნეს მხოლოდ ამ წესით განსაზღვრული ავტორიზაციის პირობების დაკმაყოფილების შემდეგ.

4. ამ წესის მე-2 მუხლის მე-3 პუნქტის „დ-ვ“ განსაზღვრული ცხოველის საკვების ბაზარზე განთავსება, გამოყენება ან გადამუშვება დასაშვებია მხოლოდ ამ წესით განსაზღვრული ავტორიზაციის პირობების დაკმაყოფილების შემდეგ.

5. სურსათში გამოსაყენებლად განკუთვნილი გმო ან ამ წესის მე-2 მუხლის მე-3 პუნქტის „ა-გ“ ქვეპუნქტებით განსაზღვრული სურსათი, ასევე ამ წესის მე-2

მუხლის მე-3 პუნქტის „დ-ვ“ განსაზღვრული ცხოველის საკვების ავტორიზაციისათვის აუცილებელია ავტორიზაციის მაძიებლის მიერ შესაბამისად და სრულყოფილად იქნეს დასაბუთებული, რომ აღნიშნული პროდუქტი აკმაყოფილებს ამ მუხლის პირველი და მე-2 პუნქტებით განსაზღვრულ მოთხოვნებს.

6. ამ მუხლის მე-3 პუნქტით განსაზღვრული ავტორიზაცია შეიძლება ვრცელდებოდეს:

ა) გმო-ზე და სურსათზე, რომელიც შეიცავს ამ გმო-ს ან შედგება ამ გმო-გან, ასევე სურსათზე, რომელიც წარმოებულია ან შეიცავს ამ გმო-დან წარმოებულ ინგრედიენტებს;

ბ) სურსათზე, რომელიც წარმოებულია გმო-დან, ასევე სურსათზე, რომელიც წარმოებულია ან შეიცავს ასეთ სურსათს;

გ) ინგრედიენტზე, რომელიც წარმოებულია გმო-დან, ასევე სურსათზე, რომელიც შეიცავს ამ ინგრედიენტს.

7. ამ მუხლის მე-4 პუნქტით განსაზღვრული ავტორიზაცია შეიძლება ვრცელდებოდეს:

ა) გმო-ზე და ცხოველის საკვებზე, რომელიც შეიცავს ამ გმო-ს ან შედგება ამ გმო-სგან, ასევე ცხოველის საკვებზე, რომელიც წარმოებულია ამ გმო-დან;

ბ) ცხოველის საკვებზე, რომელიც წარმოებულია გმო-დან, ასევე ცხოველის საკვებზე, რომელიც წარმოებულია ან შეიცავს ასეთ ცხოველის საკვებს.

8. ამ მუხლის მე-3 და მე-4 პუნქტებით განსაზღვრული ავტორიზაციის გაცემა, გაცემაზე უარის თქმა, განახლება, შეცვლა, შეჩერება ან გაუქმება დასაშვებია ამ წესის შესაბამისად.

9. ავტორიზაციის მაძიებელი ან მისი წარმომადგენელი ამ მუხლის მე-3 და მე-4 პუნქტებით განსაზღვრული ავტორიზაციის გავლის შემდეგ რეგისტრირებული უნდა იყოს საქართველოს გარემოს დაცვისა და სოფლის მეურნეობის სამინისტროს სახელმწიფო კონტროლს დაქვემდებარებული საჯარო სამართლის იურიდიული პირი - სურსათის ეროვნულ სააგენტოში (შემდგომში - სააგენტო).

## **მუხლი 5. ავტორიზაციის პირობები და პროცედურები**

1. გენეტიკურად მოდიფიცირებული სურსათისა და ცხოველის საკვების ავტორიზაციას, ამ მუხლით განსაზღვრული პირობების და პროცედურების შესაბამისად, ახორციელებს სააგენტო.

2. ამ წესის მე-4 მუხლის მე-3 და მე-4 პუნქტებით განსაზღვრული გენეტიკურად მოდიფიცირებული სურსათისა და გენეტიკურად მოდიფიცირებული ცხოველის საკვების ავტორიზაციისათვის ავტორიზაციის მაძიებელი ვალდებულია

სააგენტოში წარადგინოს განაცხადი. განაცხადს თან უნდა ახლდეს შემდეგი სახის ინფორმაცია:

- ა) ავტორიზაციის მაძიებლის გვარი, სახელი, მისამართი;
- ბ) სურსათის/ცხოველის საკვების დასახელება, დანიშნულება, მისი მახასიათებლები, გამოყენებული ტრანსფორმაციის შედეგ(ებ)ის ჩათვლით;
- გ) საჭიროების შემთხვევაში დამატებითი ინფორმაცია, რომელიც უზრუნველყოფს „ბიოლოგიური მრავალფეროვნების კონვენციის ბიოუსაფრთხოების კარტახენას ოქმის“ II დანართით განსაზღვრულ მოთხოვნებთან შესაბამისობას;
- დ) საჭიროების შემთხვევაში, სურსათის/ცხოველის საკვების წარმოების და დამუშავების მეთოდის დეტალურ აღწერის, ხოლო ცხოველის საკვებთან დაკავშირებით დამატებით, ასევე ცხოველის საკვების მიზნობრივი გამოყენების შესახებ;
- ე) საჭიროების შემთხვევაში, ყველა სხვა მასალის ასლი, მათ შორის, სადაც შესაძლებელია, დამოუკიდებელი, რეცენზირებული კვლევები, რომლითაც დადასტურებული იქნება, რომ სურსათი/ცხოველის საკვები შეესაბამება ამ წესის მე-4 მუხლის პირველი პუნქტით განსაზღვრულ მოთხოვნებს;
- ვ) გენმოდიფიცირებული სურსათის/ცხოველის საკვების ან გენმოდიფიცირებული სურსათიდან წარმოებული სურსათის ბაზარზე განთავსების შესაბამისი პირობები, მათ შორის გამოყენების და განკარგვის (მოპყრობის) სპეციალური პირობები;
- ზ) გენმოდიფიცირებული სურსათის/ცხოველის საკვების და/ან გენმოდიფიცირებული სურსათიდან/ცხოველის საკვებიდან წარმოებული სურსათის/ცხოველის საკვების ტრანსფორმაციის შედეგის დეტექციის და იდენტიფიკაციის მეთოდები და ნიმუშის აღების მეთოდები, ნიმუშის აღების ოფიციალური ან სტანდარტული მეთოდების ჩათვლით;
- თ) სურსათის/ცხოველის საკვების საკონტროლო ნიმუშები, ასევე ინფორმაცია იმ ადგილის შესახებ, სადაც ხელმისაწვდომია ეტალონური(რეფერენტული) ნიმუშები;
- ი) შესაბამისი ინფორმაცია, რითაც დადასტურებულია, რომ სურსათის/ცხოველის საკვების მახასიათებლები არ განსხვავდებიან ჩვეულებრივი ტრადიციული ანალოგის მახასიათებლებისაგან, მათი დასაშვები ბუნებრივი ცვლილებების ზღვრების გათვალისწინებით, ასევე სურსათის/ცხოველის საკვების ეტიკეტის ნიმუში, რომელიც უნდა შეესაბამებოდეს ამ წესითა და საქართველოს კანონმდებლობით განსაზღვრულ მოთხოვნებს;
- კ) ყველა დასაბუთებული განაცხადი, მათ შორის ეტიკეტზე, რომ სურსათი/ცხოველის საკვები არ გამოიწვევს რაიმე სახის რელიგიურ ან ეთიკურ პრობლემას;
- ლ) საჭიროების შემთხვევაში, წინადადებები სურსათის/ცხოველის საკვების ბაზარზე განთავსების შემდგომი მონიტორინგის განხორციელებისათვის;

მ) წარმოდგენილი ინფორმაციის რეზიუმე.

3. იმ შემთხვევაში, თუ განაცხადი დაკავშირებულია გმო-სთან, რომელიც განკუთვნილია სურსათში/ცხოველის საკვებში გამოყენებისთვის, მაშინ ამ მუხლის მე-2 პუნქტით განსაზღვრული „სურსათი“/„ცხოველის საკვები“ ნიშნავს სურსათს/ცხოველის საკვებს, რომელიც შეიცავს, წარმოადგენს ან წარმოებულია იმ გმო-სგან, რომელზედაც ავტორიზაციის მაძიებელს შეაქვს განაცხადი;

4. გმო-ს შემთხვევაში ან სურსათის/ცხოველის საკვების შემთხვევაში, რომელიც შეიცავს გმო-ს ან შედგება გმო-სგან, ავტორიზაციის განაცხადს, გარდა ამ მუხლის მე-3 პუნქტით განსაზღვრული ინფორმაციისა თან უნდა ახლდეს:

ა) გმო-ს დახასიათება-აღწერა;

ბ) გარემოს მიმართ რისკის (ეკოლოგიური რისკის) შეფასების დოკუმენტები;

გ) მონიტორინგის გეგმა, გარემოს მიმართ რისკის (ეკოლოგიური რისკის) შეფასების განხორციელებისათვის. დროის იმ პერიოდის მითითებით, რომელშიც უნდა განხორციელდეს მონიტორინგი.

5. იმ შემთხვევაში, თუ ავტორიზაცია დაკავშირებულია ნივთიერებასთან, რომლის გამოყენება და ბაზარზე განთავსება რეგულირდება საქართველოს კანონმდებლობით, მაშინ ავტორიზაციის განაცხადში მითითებული უნდა იქნეს ამ ნივთიერების სტატუსი, ასევე მისი რეგისტრირებულ ან/და დაშვებულ ნივთიერებათა სიაში შეტანის ან სიიდან ამოღების საჭიროება, საქართველოს კანონმდებლობით განსაზღვრული მოთხოვნების შესაბამისად.

6. ამ წესის მე-4 მუხლის მე-3 და მე-4 პუნქტებით განსაზღვრული სურსათის/ცხოველის საკვების ავტორიზაციისათვის სააგენტომ უნდა განახორციელოს შემდეგი პროცედურები:

ა) დაადასტუროს ამ წესის მე - 3 მუხლის მე-2-5-ე პუნქტებით განსაზღვრული ავტორიზაციის შესახებ განაცხადის და საჭირო ინფორმაციის მიღება შესაბამისი თარიღის მითითებით და ავტორიზაციის მაძიებელს არაუგვიანეს 14 დღის ვადაში აცნობის წერილობით განაცხადის მიღების თაობაზე.

ბ) ამ წესის მე-4 მუხლის პირველი პუნქტით განსაზღვრული მოთხოვნების დამადასტურებელი ინფორმაციის საზოგადოებისათვის ხელმისაწვდომობის მიზნით უზრუნველყოს მოკლე ანგარიშის სააგენტოს ვებ-გვერდზე განთავსება;

გ) შეიმუშაოს ავტორიზაციის განაცხადის მომზადების და წარდგენის წესები და ასევე გმო სურსათის/ცხოველის საკვების ერთიანი რეესტრის ფორმა.

7. სააგენტომ ავტორიზაციის შესახებ განაცხადის მიღებიდან არაუგვიანეს 3 თვისა, უნდა უზრუნველყოს განაცხადის და თანმხლები ინფორმაციის განხილვა. ამ ვადის გახანგრძლივება შესაძლებელია სააგენტოს მიერ დამატებითი ინფორმაციის მოთხოვნების შემთხვევაში.

8. სააგენტო ავტორიზაციის მაძიებელს განუსაზღვრავს ვადას დამატებითი ინფორმაციის წარდგენის შესახებ და აცნობებს წერილობით.



9. სააგენტოს მიერ დამატებით წარდგენილი ინფორმაციის განხილვა და ბაზარზე განთავსებასთან დაკავშირებით შესაბამისი გადაწყვეტილების მიღება უნდა განხორციელდეს დამატებითი ინფორმაციის მიღებიდან არაუგვიანეს 3 თვის ვადაში.

10. გენეტიკურად მოდიფიცირებული სურსათის/ცხოველის საკვების ბაზარზე განთავსებისათვის დაშვებასთან დაკავშირებული გადაწყვეტილება უნდა მოიცავდეს შემდეგი სახის ინფორმაციას:

ა) ავტორიზაციის მაძიებლის გვარი, სახელი, მისამართი;

ბ) სურსათის/ცხოველის საკვების დასახელება, დანიშნულება და ძირითადი მახასიათებლები;

გ) ევროკავშირის ან გენეტიკურად მოდიფიცირებული სურსათისა და ცხოველის საკვების მარეგულირებელი სხვა სახელმწიფო ორგანოს მიერ გმო-თვის მინიჭებული უნიკალური იდენტიფიკატორი;

დ) საჭიროების შემთხვევაში კარტახენას ოქმის დანართი N2-ით განსაზღვრული ინფორმაცია;

ე) სურსათის და/ან ამ სურსათიდან წარმოებული სურსათის ეტიკეტის, ცხოველის საკვების ეტიკეტის ნიმუში;

ვ) საჭიროების შემთხვევაში ნებისმიერი პირობა და/ან შეზღუდვა გენმოდიფიცირებული სურსათის/ცხოველის საკვების ბაზარზე განთავსებისათვის, და/ან განსაკუთრებული პირობები და შეზღუდვები, რომელიც დაკავშირებულია მათ გამოყენებასა და უშუალოდ მოპყრობასთან ეკოსისტემის/გარემოს ან გეორგაფიული არეალის დაცვის უზრუნველსაყოფად, ასევე ბაზარზე განთავსების შემდგომი მონიტორინგის მოთხოვნები, რომელიც გამომდინარეობს რისკის შეფასებიდან;

ზ) ევროკავშირის რეფერენს-ლაბორატორიების მიერ ვალიდირებულ მეთოდები ნიმუშის აღებისა და ტრანსფორმაციის იდენტიფიკაციისათვის და საჭიროების შემთხვევაში ვალიდირებული მეთოდები სურსათში და/ან ამ სურსათიდან წარმოებულ სურსათში და ცხოველის საკვებში ტრანსფორმაციის აღმოჩენისა და იდენტიფიკაციისათვის ასევე, საჭიროების შემთხვევაში, ინფორმაცია საჭირო რეფერენტული ნიმუშის ადგილმდებარეობის შესახებ.

11. ამ წესის მე-3 მუხლის მე-2 პუნქტით განსაზღვრულ სურსათზე/ცხოველის საკვებზე სააგენტოს მიერ ავტორიზაცია გაიცემა ევროკავშირის ან გენეტიკურად მოდიფიცირებული სურსათისა და ცხოველის საკვების მარეგულირებელი სხვა სახელმწიფო ორგანოს მიერ გაცემული ავტორიზაციის ვადის შესაბამისად.

12. თუ ავტორიზაცია განხორციელდა იმ ნივთიერებასთან დაკავშირებით რომელიც რეგულირდება საქართველოს კანონმდებლობით, მაშინ მისი ბაზარზე განთავსება უნდა აკმაყოფილებდეს ამ წესისა და საქართველოს კანონმდებლობით განსაზღვრულ მოთხოვნებს.

13. საზოგადოებისათვის ხელმისაწვდომობის მიზნით, სააგენტოს მიერ სურსათის/ცხოველის საკვების ავტორიზაციისთან დაკავშირებული გადაწყვეტილება განთავსებული უნდა იქნეს სააგენტოს ვებ-გვერდზე 30 დღის განმავლობაში.

## **მუხლი 6. ავტორიზაციის შეცვლა, შეწყვეტა, გაუქმება და განახლება**

1. სააგენტოს მიერ ამ წესის მე-2 მუხლის მე-3 პუნქტით განსაზღვრული გენმოდულიცირებული სურსათის/ცხოველის საკვების ავტორიზაციის შეცვლა, შეწყვეტა და გაუქმება ხორციელდება ევროკავშირის ან გენეტიკურად მოდიფიცირებული სურსათისა და ცხოველის საკვების მარეგულირებელი სხვა სახელმწიფო ორგანოს მიერ გაცემული ავტორიზაციის შეცვლის, შეწყვეტის ან გაუქმების შესაბამისად.

2. სააგენტოს მიერ ამ წესის მე-2 მუხლის მე-3 პუნქტით განსაზღვრული გენმოდულიცირებული სურსათის/ცხოველის საკვების ავტორიზაციის განახლებისათვის ავტორიზაციის მაძიებელმა სააგენტოს უნდა მიმართოს განცხადებით ავტორიზაციის ვადის გასვლამდე ერთი წლით ადრე. ავტორიზაციის განახლება ხორციელდება ევროკავშირის ან გენეტიკურად მოდიფიცირებული სურსათისა და ცხოველის საკვების მარეგულირებელი სახელმწიფო ორგანოს მიერ გაცემული ავტორიზაციის განახლების შესაბამისად, ამ წესის მე-5 მუხლის მე-2 პუნქტით განსაზღვრული ინფორმაციის წარდგენის შემდეგ.

## **მუხლი 7. გენეტიკურად მოდიფიცირებული სურსათის/ცხოველის საკვების ეტიკეტირება**

1. გენეტიკურად მოდიფიცირებული სურსათის/ცხოველის საკვების ეტიკეტირება უნდა განხორციელდეს საქართველოს კანონმდებლობითა და ამ წესით განსაზღვრული მოთხოვნების გათვალისწინებით.

2. გარდა ამ მუხლის პირველი პუნქტით განსაზღვრული მოთხოვნებისა, გენეტიკურად მოდიფიცირებული სურსათის ეტიკეტზე მითითებული უნდა იქნეს სურსათის ნებისმიერი მახასიათებლის ან თვისების შესახებ, რომელიც ავტორიზაციის პირობებით არის განსაზღვრული, კერძოდ:

ა)თუ სურსათი განსხვავდება მისი ტრადიციული ანალოგისაგან, ეტიკეტზე მითითებული უნდა იქნეს სურსათის:

ა.ა) შემადგენლობა;

ა.ბ) კვებითი ღირებულება ან კვებითი ეფექტი (კვებითი დანიშნულება);

ა.გ) მიზნობრივი გამოყენება;

ა.დ) მოსახლეობის გარკვეულ ჯგუფების ჯანმრთელობაზე ზეგავლენა;  
 ბ) ეთიკური და რელიგიური პრობლემები, რომელიც შესაძლებელია გამოიწვიოს სურსათის მოხმარებამ.

3. გარდა ამ მუხლის პირველი პუნქტით განსაზღვრული მოთხოვნებისა, გენეტიკურად მოდიფიცირებული ცხოველის საკვების ეტიკეტზე მითითებული უნდა იქნეს ცხოველის საკვების ნებისმიერი მახასიათებლის ან თვისების შესახებ, რომელიც ავტორიზაციის პირობებით არის განსაზღვრული, კერძოდ:

ა)თუ ცხოველის საკვები განსხვავდება მისი ტრადიციული ანალოგისაგან, ეტიკეტზე მითითებული უნდა იქნეს ცხოველი საკვების:

ა.ა) შემადგენლობა;  
 ა.ბ) კვებითი თვისებები;  
 ა.გ) მიზნობრივი გამოყენება;  
 ა.დ) ცხოველის გარკვეულ სახეობების და კატეგორიების ჯანმრთელობაზე ზეგავლენა;

ბ) ეთიკური და რელიგიური პრობლემები, რომელიც შესაძლებელია გამოიწვიოს ცხოველის საკვების გამოყენებამ.

### **მუხლი 8. საზოგადოებრივი ხელმისაწვდომობა**

1. ამ წესის მე-5 მუხლის მე-2 პუნქტით განსაზღვრული ავტორიზაციის განაცხადი, ავტორიზაციის მაძიებლის გვარი, სახელი, ავტორიზაციის მაძიებლის მიერ წარდგენილი დამატებითი ინფორმაცია, სააგენტოს მიერ მიღებული გადაწყვეტილება საზოგადოებისათვის უნდა იყოს ხელმისაწვდომი გარდა კონფიდენციალური ინფორმაციისა.

2. კონფიდენციალურ ინფორმაციას არ მიეკუთვნება:

ა) ამ წესის მე-2 მუხლის მე-3 პუნქტით განსაზღვრულ გენმოდიფიცირებული სურსათის/ცხოველის საკვების დასახელება და შემადგენლობა, საჭიროების შემთხვევაში სუბსტრატისა და მიკროორგანიზმის მითითება;

ბ) გმო-ს ზოგადი დახასიათება და ავტორიზაციის მფლობელი გვარი, სახელი, მისამართი;

გ) ამ წესის მე-2 მუხლის მე-3 პუნქტით განსაზღვრული გმო-ს, სურსათის/ცხოველის საკვების ფიზიკურ-ქიმიური და ბიოლოგიური მახასიათებლები;

დ) ამ წესის მე-2 მუხლის მე-3 პუნქტით განსაზღვრული გმო-ს, სურსათის/ცხოველის საკვების ზემოქმედება ადამიანი/ცხოველის ჯანმრთელობაზე და გარემოზე;

ე) ამ წესის მე-2 მუხლის მე-3 პუნქტით განსაზღვრული გმო-ს, სურსათის/ცხოველის საკვების ზეგავლენა ცხოველური წარმოშობის პროდუქტების მახასიათებლებზე და მათ კვებით თვისებებზე;

ვ) ამ წესის მე-2 მუხლის მე-3 პუნქტით განსაზღვრული გმო-ს, სურსათის/ცხოველის საკვების გენმოდიფიცირებული სურსათის/ცხოველის საკვების და/ან გენმოდიფიცირებულისურსათიდან/ცხოველის საკვებიდან წარმოებული სურსათის/ცხოველის საკვების ტრანსფორმაციის შედეგის დეტექციის და იდენტიფიკაციის მეთოდები და ნიმუშის აღების მეთოდები.

3. სააგენტო ვალდებულია უზრუნველყოს ყველა სახის ინფორმაციის კონფიდენციალურობა, გარდა იმ ინფორმაციისა, რომელიც ეხება ადამიანის/ცხოველის ჯანმრთელობას ან გარემოს დაცვას.

### **მუხლი 9. სახელმწიფო კონტროლი**

გენმოდიფიცირებული სურსათისა და ცხოველის საკვების სახელმწიფო კონტროლს, საქართველოს კანონმდებლობით განსაზღვრული წესით ახორციელებს:

- ა) სსიპ - სურსათის ეროვნული სააგენტო;
- ბ) სსიპ - შემოსავლების სამსახური.